



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7 Yangia anidaka



Tir Yimyim



tir_yimyim



tir yimyim

TAPAK 8

Tashi kasa bener Trump aser Xi Jinping na ajuruteper

Asian Games: Roshibina-i silver aser mixed skeet team-i bronze angu



VOL. XXIII ISSUE NO. 345 (ADOK 345) DIMAPUR ROGONÜ (FRIDAY) RONGJUI (SEPTEMBER) 25, 2026

5.00

Interlocutor tasen shimba atema Gol dang pelar: NSCN/GPRN



Ajit Lal

Dimapur, Rongjui/Sept. 24 (TYO): Indo-Naga yimten ken o jembitsü atema interlocutor tasen, retired IPS officer aser taoba Chairman, Joint Intelligence Committee (JIC), Ajit Lal shimba asoshi Government of India (GoI) dang pelaba lemsateper, ta Brehostibarnü National Socialist Council of Nagalim (NSCN/GPRN) sangdong ka ajanga ashi. Pa shimba ajanga yimjung maparen süoki ia tekeraba nung bentettsü GoI temulungtetba asendenshiba sayur. Ano talisa GoI-i negotiation framework nung Union Minister ka mesüra Union-level Ministers telok ka indoktsü telemtetba agiba

pela agizüker. Iba yagi yimten ken o jembiba tekeraba nung benteta ajaki akhumtsüboa aser teti asoshi yimtenren tsütsü tangatettep kati arutsü atema inyakba nung yaritsü imlar, ta NSCN/GPRN ajanga ashi.

Chief Minister Neiphiu Rio-i anir Nagaland sorkari Indo-Naga yimten ken o jembiba nung temulung agüja shilem agiba aser yaritepba asoshia pelaba lemsateper. Nagaland sorkari tangatetba tajung nung inyaksangshiba ajanga yimjung maparen takum süa aliba nung shilem tulu agiogo aser jembishinü nung Naga nübur indan ola tiyong südaktsü.

Ken o jembir aser lenirtem nungita yariba, külem sür nokdakba aser sarasademtsüba atema Naga nunger ajunga dang pelar. Tekeratiba nung ajaki akhumtsübotsüsa aser teti asoshi yimtenren tsütsü tangatettep ka bener arutsü atema Tsüngrem aser Naga nunger matsüngdang bendanga agütsür inyaker.

Ano Naga nunger dang maneni Naga lima asoshi lenmang shidak sayuang ta Tsüngrem dang sarasademtsü ayongzüker, ta NSCN/GPRN sangdong ajangasa ashi.

Nagaland nung Ayushman cards asoshi Aadhaar sendakteptsüla

Dimapur, Rongjui/Sept. 24 (TYO): Ayushman Bharat Pradhan Mantri Jan Arogya Yojana (AB PM-JAY) kübok empanelled hospitals nungi teyari agitsü asoshi Ayushman cards tem kechi südir süaka Aadhaar den sendakteptsü Nagaland Health Protection Society (NHPS) ajanga metetdaksüogo.

Nagaland nung Ayushman cards 1.14 lakh dak tema Aadhaar den sendaktepa mali, ta Beneficiary Identification System (BIS) nung beneficiary records asadanga nungi ajitet. Aadhaar aser Ayushman cards sendakteptsü asoshi NHPS-i November 30, 2026 ya tatem asütsü latetja lir.

NHPS-i 2018 aser September 2022 tsüngta Ayushman cards yanglur aliba nübur ajunga dang Aadhaar linkage status jangjatsü ayongzüko.

Tang tashi mesendaktepli aliba cards tem Card Generation (BIS) portal ajanga sendakteptsü NHPS ajanga ayongzüka liasü.

Aadhaar sendaktepba maparen ya Chief Medical

Officer (CMO) indang offices, Common Service Centres (CSCs), Village Level Entrepreneurs (VLEs), card vendor agencies mesüra empanelled PM-JAY hospital mashi nungi sendakteptsü akok. Latetja aliba mapang Aadhaar aser Ayushman card mesendakteper indang Ayushman card mamshitettsü, ta ashi. Card mamshiteter temi BIS portal ajanga e-KYC tasen agütsütsüsa akumtsü.

AB PM-JAY mezüing 2018 nungi September 2022 tashi amshiba mapang Ayushman cards ya Socio-Economic Caste Census (SECC) aser Rashtriya Swasthya Bima Yojana (RSBY) data sources ajanga jangjateter asoshi Aadhaar mesendaktepi yanglua liasü.

Ajisüaka National Health Authority indang IT platform ajanga 'beneficiary mapping exercise' inyakba mechi Aadhaar sendakteptsü ya ozüing süa kumdaktsü.

Aadhaar aser Ayushman cards mesendaktepi aliba beneficiaries indang tenüngtem NHPS-i renema lir, ta ashi.

Ungma-i V.S.Atem aser R.H.Raising na lenisüba anemer

Ungma, Sept.24 (TYO): NSCN-IM lenir V.S.Atem aser R.H.Haising nati aniba telok kecha mapa nunga Ungma sensosangertemi meyariteptsü aser madentsü ta Ungma Senso Mongdang sangdong ka nung metetdaksüogo.

Iba telemtetba ya September 24, 2026 nü Ungma yimti nung Ungma Senso Mongdang rondak lokti senden ka alidang lemtet. Iba telemtetba den külemi Ungma Sensosangertemisa , " Nagaland nung madenertemi Nagaland nung lenisüba aser yimten mapa amushia shilem agitsü merangbaji magizüker," ta NSCN-IM anati tawa taoba Chief minister aser Governor Dr. S.C.Jamir anema jembiba ken o aija lemtetba sangdong ka nung metetdaksüogo.

Ungma Senso Mongdangisa, Naga nunger yimten lenir aser Ungma senso Dr.S.C.Jamir ama ka anema Nagaland nung madenba NSCN-IM lenir anati ngasangatema jembibaji, pa mezüingmeshiba mapa ka dang masü saka Nagaland nung alir ajunga aser talisa Ungma nunger mezüingmeshiba mapa ka asütsü

ta kanga jashia metetdaksüogo.

"Naga yimten tongpang ya Nagaland nung tenzük aser Ungma nungertemia Naga yimten nung tongti shilem agia aruogo. Aji oda, 1958 küm Naga People's Convention 2 buba senden May 21 nungi 23 tashi Ungma yimtak amung aser ano 2025 küm a August 23 nü FNR teloki anir Naga yimten nüchiso bushir telok ajak adenshia yimten senden ka menogo . Naga yimten nüchiso asoshi Ungma nungertema taküm aika bendanga agütsüogo, idangji nena kong liasü aser nenoki kechi inyak ?," ta Ungma Senso Mongdang sangdong nungsa NSCN-IM lenirtem nem tasüngdanga agütsüogo.

NSCN-IM lenir anati tawa osangbenertem den jembidang, Dr.S.C.Jamiri Naga yimten indang jembitsü temeten mali aser paji Naga nunger yimten ken o jembitsüba okatsür masü ta ashiba o ji Naga nunger yimsüsürtem rongnunga walunir mezüingmeshia jembiba taaktsü maket o ka lir ta Ungma Senso Mongdangisa metetdaksü.

Kasa ken o nung Ao Sendeni NSCN-IM lenirtem nem parnok

o meyipa agitsü asoshi anogo 15 züingzüka toktsüba nungji onoka adener aser Nagaland nung alir senso ajaki iba ama mapang nung pei tasoli temeten asoshi longjemer nokdaksü ayongzüker ta Ungma-isa metetdaksü.

Nagaland nung alir Naga yimten lenirtem kar dak danga tangari tamajung inyakra, ibajibo nübortem longjemer tatem tashi nokdangtsü ta parnokisa metetdaksüogo.

Kasa sangdong nung, NPF lenir aser MLA Achumbemo Kikon-ia Dr.S.C.Jamir anema jembiba o aija ashidang, "yimten nung pei jenjang ka ajangzüksü bilema, Naga yimten otsü junga memetet ser mejembitsüla, kechiyong nai Naga nungertemi yimten asoshi bendanga agüja inyakba aser timtemba mangu," ta Ungma Senso Mongdangisa metetdaksü.

Iba ama mapang ka nung yariteper lokti tentet ajak dang Ungma Sensosangertemi pelaba metetdaksüogo aser ano maneni longjemer Naga nunger melongjemdaktsütsü inyakba anema nokdaksü tayongzüka ka agütsüogo.

CNFN-i Nagaland sorkar dang Naga yimden nungi ainshitsü ashir

Dimapur, Rongjui/Sept. 24 (TYO): Concerned Naga Forum, Nagaland (CNFN) ajanga Nagaland sorkar dang Naga yimten inyakyim nungi ainshitsü ayongzüker aser yamaji meinyakra political solution nung sorkari tetsükdaksü agütsür ama ajiteta President's Rule benoktsü akok, ta tekumdagtsü ashi.

Iba telemtetba ya Dimapur nung September 21 nü CNFN indang 7 buba lokti senden nung renem aser media nem Brehostibarnü sangdong agüja liasü.

Ajaki akhumtsüboa agizüktettsüsa aser ajak dena Naga political solution bener aruba nung yaritsü asoshi ainshitsü state sorkari nangzüka lir. Naga nunger yimden ken o jembiba telok anati political agreements zülutepogo, anungji

state sorkari nangzüka ama inyaka lenmang lapoktsütsü tim, ta ashi.

Yamaji meinyakra, tangatettep kati aruba lenmang nung tenokdangba agütsütsü aser India sorkari President's Rule benoka political settlement ka agütsütsü, ta CNFN-i ashi.

Iba forum yagisa state sorkari interlocutor tsen ka shimtsü akhangba aitsü aser ibai facilitator mapa alema oa inyakba lir ta ashi.

Interlocutor tasen meshiba ajanga jembishinü tenzükshitsü. State sorkari yamaji inyaknura, agreements ana ya magizüki Nagaland Legislative Assembly nung tapet pangzüing yanglutsüla, ta ashi.

State sorkari jembishinü tasen tenzüktsü merangra, ibaji ajanga parnok facilitator masü party ka akumtsü.

Kangpokpi nung Naga nunger ki 41 rongdoktsü

Imphal, Rongjui/Sept. 24 (Agencies): Manipur nung Kangpokpi district kübok Makui area nung kin balala tsüngta khatepba osang tem temai adokogo, kong ghonda 12 shi mepetmesü mapang tekülem ki kar densema Naga nunger ki 41 raksatsüba indang osangtem angazüker.

Iba lendong yagi talisa tesem asem - Makui Chamriupui, Makui Thanamba aser Makui Thebram - nung kongshi. Makui Chamriupui nung ki 17 okshia raksatsü, Makui Thanamba nung ki ti aser Makui Thebram nung ki 16 raksatsü, ta yangji alirtemi ashir.

Tenük kuli alirtemi ashiba agi, item ki o jen raksatsüba ya September 23 nikongdang 2:30 ako meta tenzük aser tasüingnep (September 24) 2:30 ako tashi liasü. Kuki telungpuri iba mapa ya inyak, ta pei ki raksatsür tesem balala nung jenshia alirtemi ashir.

Parnoki ano yangji aliba security dak temulung machiba lemsatepa liasü. Tang tesüsa lendong atalokba nungi kilometer 10 temeket nung Central Reserve Police Force (CRPF) aser India Reserve Battalion (IRB) personnel tem amenoka lir, saka iba lendong atalokba mapang

maru, ta parnoki ashir.

Ki nung mi senloksür anogo tesadang ka lir parnok pei ki yutsür ainshi, ta yimdaklir temi ashir. Item nisungtem ya Makui village centre nung jenoka lir.

Ki o jen raksatsüba sülen Brehostibar nikongdang Kuki nunger telungpur telok tem aser Naga nunger tsüngta tesem balala nung raraba osang temai adoker. Iba osang züluba mapang ketdangtsür temi rara adoka aliba indang tejanga osang monguteti liasü. Ajisüaka tang tashibo yangji nisung asü-amaba mali, ta administrative osangtem ajanga ashir.

Angh-i Child Rights Commission inyakyim lepa reprangshir



Nand Kishore Yadav-i Nagaland State Commission for Protection of Child Rights (NSCPCR) ketdangsürtem den September 24 nü Lok Bhavan, Kohima nung külemi tangokba noksa angur.

Dimapur, Rongjui/ September 24 (TYO): Nagaland Angh Nand Kishore Yadav-i ayongzüka Nagaland State Commission for Protection of Child Rights (NSCPCR) ketdangsürtem den September 24 nü Lok Bhavan, Kohima nung senden ka menogo.

Senden nung Commission-i 2023 küm nungi tang tashi inyaka aruba maparen balala indang metetdaksü. Commission-i, Nagaland kübok district balala nung Juvenile Justice (Care and Protection of Children) Act, 2015, Protection of Children from Sexual Offences (POCSO) Act, 2012, Right to Education Act, 2009, aser Child and Adolescent Labour (Prohibition and Regulation) Act, 1986 densema tanurtem kümzüka toktsütsü atema ozüng balala benoka inyakba aser asadanga aliba indang metetdaksü.

Commission-isa, kin balala lokti tentettem, village council tem, school tem aser District Heads of Department tem densema awareness sentong balala ayongzüka agia arudar ta metetdaksü. Parnokisa Police, Judiciary, Social Welfare, Health, Education, Labour aser NGO tem longjemer inyadkatsütsü atema jenjang agiba den Child Care Institution,

Observation Home, Special Home aser school tem semdangogo ta ashi.

Maneni Commission-i, tanurtem temeden aser parnok kümzüka toktsütsüba dak sendakba nung Radio aser Doordarshan nung sensaksem sentongtem ayongzüko, aser Nagaland Police Training School nung JJ Act aser POCSO Act bendenloksü atema teyari agütsüo.

Iba lepa reprangshiba senden ajanga Commission-i mapa balala benoka inyakba indang angatetdaksüo, kong State aser district jenjang nung JJ Act aser POCSO Act dak sendakba nung police personnel tem atema training sentong ayongzüka katsüba aser iba den osangbenertem atema "Child Friendly Media" aser tanurtem kümzüka toktsütsüba nung media shilem dak sendakba nung workshop tem ayongzüka katsüba densema lir.

Tawang, Arunachal Pradesh nung convergence sentong ka agiba mapang Tawang Declaration yanglua benokba nunga Commission-i shilem agia liasü.

Kasa mapang nung Commission-i, tanurtem aser talisa tekelok shisatsü agi tangar memenepertem, mata mabensartem aser temesepba mozü achirtem anepalutsü aser parnok kümzüka toktsütsü

asoshi infrastructure aser facility tem tapet maliba densema tetsükdaksü balala ajangshiba indang metetdaksü.

Iba presentation ajangsa, züngsem aser regular staff talila bendenloka Commission tashi itshitsü, aser maparen tetangshiba inyaktetsü atema senotsü talila agütsütsü nüngdakba metetdaksüo.

Maneni Commission-i parnok tarutsü sentongtem indang metetdaksü, kong okadak aser police station tem nung tanur dak apet takdangtem yanglutsü atema ajungshitsüba densema lir. Iba den temesepba mozü achiba, tanur shibelenba aser tanurtem mezüngmeshia amshiba, online & digital safety, shitemang agi tangar memenepba tanurtem, aser tongtibat stakeholder tem nem tangazükba agütsütsüba densema district ajunga nung awareness, sensitisation aser capacity building sentongtem maneni ayongzüka agitsü parnok sentong lir.

Iba senden nung, Nagaland nung aliba tanurtem kümzüka toktsütsü atema inyakyim akangshitsü aser tanurtem temeden ajungketba den parnok ajangzükdaksütsü atema Commission-i tang tinyakdak aliba mapatem, tetsükdaksütem aser tarutsü sentongtem asadangogo.



Mon jila kübok Thamnan Ward nung July 19, 2026 alinen lendong nung asür nisung ti kibong shia nem Forerunners Nagaland Foundation indang Secretary, Sentimeren Pongen (achichi nungi asembuba) ajanga teyari sen 10,000 agütsüba noksa nung angur. Kasa noksa nung ADC Mon, Pakon Phom angur.

Post-draft publication dak sendakba nung BLOS tem training agi

Dimapur, Rongjui/ September 24 (TYO): Electoral Rolls, 2026, Special Intensive Revision (SIR) kübok post-draft publication inyakyim dak sendakba nung 4-Ghaspani-I aser 5-Ghaspani-II Assembly Constituency tem nungi Booth Level Officers (BLOs) tem atema training sentong ka ayongzüka agiogo. Training ya DPDB Hall, DC Office, Chumoukedima nung September 24 nü agia liasü.

Sentong ya Additional Deputy Commissioner & Electoral Registration Officer (ERO), Chumoukedima, Lemlila Sangtam, NCS-i ketdangsüa agi.

BLO tem den jembiba mapang lai, constituency anaprongla nung electorate tem aika lir ta shia iba ajanga inyakyim achaayangba ERO aser AERO tem khuret tuluba akümba indang lemsatep. Lai BLO tem dang taruba anogo 30 pei mapa dak rangloker alitsü aser electoral rolls nung aibelentem jangjatsü atema longjemer inyaksü ajungshiba

den, inyakyim dak ajemdaker mapa kecha sentoka metoktsü jangja jangja inyaksü ayongzüka liasü.

Laisa, iba inyakyim nung BLO tem mapang kanga tongtibat lir aser ken o balala menomeyang mesüi bentettsü nüngdakba lemsatep, kechiyong iba inyakyim takok ya parnok dak keta lir, kechiyong parnok ya voter tem den sendakteptsü asoshi ajak dang tongtibatanga lir, ta ashi.

Maneni lai BLO tem dang structural back-end error tem metongshitsü tetuyuba agütsü, kong voter tem indang ki mesüra section number ya parnok aliba tesemtem den meputepi aliba densema lir.

September 20 nungi November 18 tashi Claims aser Objections benokba mapang BLO temi inyakyim aser parnok mapa meteta toktsütsü nükjidong iba training ya ayongzüka agiogo. Ajak senteper 4 Ghaspani-I nungi BLO 127 aser 5 Ghaspani-II nungi BLO 54-i iba training sentong nung shilem agia liasü.

Peren nung National Ayurveda Day mungogo



Sentong tembangba sülen shilem agirtem tangokba noksa nung angur.

Dimapur, Rongjui/ September 24 (TYO): Ayurveda School Health Programme (ASHP), Peren-i ayongzüka September 23 nü Mhainamtsi Govt High School nung National Ayurveda Day mungogo. Iba sentong ya "Ayurveda for a Healthier Tomorrow" omen nung ajemdaker agia liasü.

Sentong nung tongti tejaoker ama o jembiba mapang Mhainamtsi Village Council Chairman Kekuhungbe Iheilung-i, sentepa aliba lokti dang libaliro tajung sübatsü aser local chiyongtsütem achitsü ajungshia liasü.

Paisa, kanga junga bilemdanger alirongsentem tajungyimi amshitsü ajungshi. Pai ashiba agi, tanü lanurtem nem yimya tajung sübadakja parnok nem kakat shisatsü agütsüba den health service aser social security coverage agütsüba ajanga taruba putu libaliro tajungba kümdaksütsü.

Sentong nungsa Dr. Chapkelilakbo Dailiam, MO (ASHP) Peren-i, chiyongtsü liromedema achitsü aser anema alitsü atema tasatem dak sendakba nung tangazükba agütsü.

Kasa mapang nung Dr. Kezuyipeule, MO (AYUSH) Old Peren HWC-i, Ayurveda indang, career asoshi maangka aliba, mozü aketba süngtonglitongtem jangjatsü aser item ya amshiyim indang tangazükba agütsü.

Alakteta jaoker ama iba sentong nung o jembiba mapang Area Education Officer, Peren Hentinthang Singson-i, taküm nung libaliro tajung benshitsü koda tongtibat iba indang lemsatepba den anema alitsü asoshi pei dak nungi tenzüksüla ta ashi. Paisa, medical department-i inyakyim balala benoka inyakba indang tangazükba agütsütsü asoshi sentong nung shilem agirtem ajak ya ambassador kaka akümtsü ajungshia liasü.

Sentong nung Ingaulule Liegise, Headmistress Mhainamtsi Govt High School Ingaulule Liegise-i tepela o jembi aser Govt. High School Mhainamtsi-i ken ka aten. Iba sentong ya Dr. Chapkelilakbo Dailiam, MO ASHP Peren lenisüba nung agi aser school temeket nung mozü süngtongtem temtsüba sülen iba sentong tembanga liasü.



TIR YIMYIM YIMOBILEM (EDITORIAL)

DIMAPUR FRIDAY, SEPTEMBER (RONGJUI) 25, 2026

Election ajanga raksaba

Nagaland nung election nung shilem agiba ajanga raksaba taküm aser kibong aika lir, iba jagi Nagaland nung yimten dang masü saka lokti aser arogo dena kanga mejungi menentsüogo. Item takoksa dang nungi tulutibaji Naga yimten nüchiso bushiba lenmang aibelendaktsüba ya asütsü. Ashiko, Nagaland nung election magii küm ishika arutet nungbo Naga yimten tebilemtsü ya kokteter lila. Ano, Nagaland nung election agiyonga Naga yimten nüchiso bushirtemi India temzüng kübok agiba election nung shilem magi aremtet nungbo koda jungla ta bilemer. Ajisüaka, asenok ajaki meshisadangi state election nung takok asaa inyakdang, süpu sü aadang sürem sü shisa ama, state government kümnü dang Naga nung yimten temeten aser telungjem kanga mejungi raksaogo. Aji oda, külen India temzüng kübok election nung shilem agir aser külen Naga yimten nüchiso indang jembir ta asenoki inyakteter. Ano kasaji, külen Naga yimten nüchiso tongpang nung sashisashia nokdaka sayur saka külenbo India temzüng kübok agiba election nunga sashisashia shilem agir ta asenoki inyaker. Iba jagi asenok rongnung kati ka kanga yiruja lir. Iba election jagi asenok aika takoksa aser timtem marem atepdendagi. Atangji, election mapang asenok yimten nüchiso bushir telok kati India political party ka pusema adokdaktsüra, ibaji shitakba nungbo asenok asenok asoshi takok masü saka asenokbo anasü nung akoksar, kechiyong taloksa kaji, asenok India government tsüngdang akhüm maket akümer aser ano takoksa tanga kaji, tamakok angurtemi election nung shilem agiba Naga yimten nüchiso bushir telok to anemer. Aji oda, asenok Naga yimten nüchiso bushirtemi India temzüng kübok agiba election nung shilem agiba ajanga Naga nung ter sadang ka nungi teyari mangutsüsa akümer. Tanü Naga yimten nüchiso bushirtemi India den yimten ken o ajak tembanga jembiogo tabo sangdong saka tang tashi mapang papigati agia mapa küma mesayutetbaji, tanga kulia alitsüa akok, saka talisa asenoki asenoksasa election nung shilem agiba ajanga India nung akümba agi India government-i asenok yimten ken o ji akhi ama reta magir südi. Ibaji kodang jungjunga bilemdangdir, Naga yimten ken o melatettetba ajanga tang ya asenok timatemer dang ashi, India-bo timtem shisabolu kecha mali kümer alitsü, kechiyong asenoki election nung shilem agiba ajanga asenok India nung kümogo ta parnoki repringteter. Aji oda, shin o nung ashi ama, asenok ya rong ana nung tetsüng külenlen asongoka yur jajar amai kümogo. Iba jagi kodanga asenok tadongtsü ka tonga rong jagi bener moutettsü ? Iba tangatetba nung, asenok Naga nungertem ya yimten nüchiso atema raradi süra, election nung shilem magitsüla ta kisüng masü saka Naga lima nung India temzüng kübok election magidaktsütsüla. Aji oda, Nagaland nung election agi tashi aser Nagaland nung India wako songa yur India yimten nüchiso tipdema mongtet tashi aser ano talisa Naga nung yimten nüchiso bushirtemi dena election nung shilem agi tashi, Nagaland nung Naga yimten tebilemtsü malia ta sayur. Iba ama jakla aser tangatetba asenok dak dena yur, kodaser asenoki Nagaland assembly nung Naga yimten nüchiso tebilemtsü indang jembiba alimai nanga agitsü aser India temzüng kübok agiba election nung shilem agir oa Delhi nung India government den jembi nung, parnoki asenok ken o ji komaka süoki ia angatsü ? Ashiko, asenokibo election nung shilem agir takok ngutsübaji, Naga yimten nüchiso tongpang tesadang ka akok amai bilemtsüa akok, saka masü, iba jagi asenok Naga yimten tongpang tesadangka dang masü saka ajak chirepogo ta bilemdi. Iba jenjangji meteta asenoki Naga yimten nung kati ka dang taitok meshitepa asentenshir menokdakra, asenok menokdaktettsü !

OLEMSABANG

AO OSHI TAMENTAKDAK ASER LIRUMEDEM

~ Mr. I. Temjen Tzüdir (Source : Nokinketer)

(Yashi adok nungi...)

Saisabong nung amentakbaren: Asen lisopur (Aor) saisabong ajak agi 80 shi lir, tat. agi teburi dang asayaba tenemsürana (52), tetsüri dang asayaba asem (3), tetsür tebur meyoktepa asayaba ter (10), tilatanurtemi asayaba terpungu (15) shi, yamaji item saisabong tapu balala asayadang jembiba, ola adokba aser nungjakoja nung asen oshi amentaka lir.

Arju aser Tsüki nung amentakba: Asenok ajaki angazüka aser jembia aruba ama akhi asen tütsütebou mapang nungi tebur asoshi "Arju" aser tetsür asoshi "Tsüki" ta item nung lanurtem sobaliba aser libalirutsü ajak angazüka aru, tetezü yangji asen oshioben ajak aremoka liasü.

Tzüyokmenyok nung asen oshioben amentaka lir: Kodang yim ka nung yimkong tzyüki odir, yangji sobaliba, yimsüyimpong, nungjakoja aser awashiren aika sentaka lir. Yimkong tzyüyokmenyok nung mapalem tabensa, telatet, yimli awashi, jungshitepren aser tambu tanubo awashiren item ajak keta lir.

Kikasüchi nung amentaka liasü: Iba kibasüchi maparen ya pei taküm kibong sobatiaba/tsür den tesentaktep junga aliba tamaitüsü dang masü saka pei sasa meranga züsentepta rongsen nungi angati nübur dang jungnüba aser awashitepa lemsatepba dena lir, koba nung asen sobaliba aser oshioben jangjaren jenti den sentaktepa angutsü.

Ao Oshi ya süngkong aser ken nung amentakba angutsü: Asen oshi ya zülü wadangi maidangyongi süngkong atemba mesüra ken atenba liasü. Süngkong ola balala atemba ajanga nüburtemi tepela, tejashi aser lendong osang agütsüba angatet. Iba den ken ajanga nisung ana ajurutepa o mejembitepaka ken ajanga sensaksem/jembitepba küptoka nungdak peritepba otsü aika lir.

Kiyimluyim nung amentakba: Otsüla oboula nung mapang (akhi) nungi asen oshioben tera aika kiyimluyimba dak amenloka liasü. Talisa alu achidang nungi tenzüker alu roa kidangi tsük bener adokba tsüngda nung asen oshioben aika amenloktepa jembitepba lir. Akhidangbo tanü amai alu meyimaka taküm kibong ka alitsübaji tamakoktsü liasü. Oda taküm kibong ajunga amentakdak/metatakakji aluyimba aser tsüngkümmongpu dak dang teimla ajak yur sobaliba-a liasü. Tsüngkümmongpu junga pela-a anisüngzüka ali saka tsüngkümmongpu mejungra iba lima nungji ayawara agi kangshitep.

Meyua ok atenba nung amentakbaren: Asen Aor ya koba teka mapa wadang nung südir süaka kija-a süang lokti-a süang mapa inyakdangji meyuwa inyaker, meyuba ajanga ajungshiteper, kümkümshiteper, tsüngkang medemer aser tatem nung kodang waluniri ok atendir ajaki shilem agia hoi, hoi ta ashitsü aser külemi anisüngzü. Ok maten tashi shianga jurila anisüngzüksü makok, kechiaser ibaji yimya agi memelar.

Ao Oshi Lirumedem: Tanabuba nung kodang Ao Oshi nung Lirumedem ta südir okila nung ashiba ama, julangjushi aser meputep khenyongi malitsüla, kati züluba kasaji tangar jagi-a zülutetba/jembitetba ta angatetogo. Süra züluyim nung lirumedemtsü jagi maodang iba lirumedem dak sentakba nung aseni tali angajemtsü kar rajemtsü merangdi. Ao oshi nung lirumedemtsü asoshi mezüngbuba nung;

Tashi angateptsü kanga tongtibang: Kechiaser oshioben ka nung tashi angatepba melira kodanga lirumedemtsü makok (Discipline is the source of uniformity). Tashi mangatep tetezü pei bilemba dang aginüba aser pei-i angatetbaji dang tongtibang aser shitak ta bilemba nungi tashi mangatepji adoker. Anungji asen oshioben nung lirumedemtsü asoshi nisung ajaki tashi angateptsüla.

Oshioben ka lirumedemtsü asoshi nisung shia taremsük aser ajemalu nungdaker. Taremsük tetezü puri ashibaji tim masü ama nai/ni bilemaka aser angatetaka atasa-a alitsü nungdak. Ajemalu tetezü na temetetba aser ne tangatetba tulu liaka aser nai ashiba nungjisa atemtsü liaka ajak lirumedemtsü atema nai nübur tia asadanga tila küma atatsübaji kanga tongtibang.

Asen Ao oshi lirumedemtsü atema "lokti dang junga kecha masü ta angatetba nungdak", saka ola madoki pei agitsü ka dang bilema jembiba aser inyakba jagi kodanga Aor lirumedem kati bener marutettsü.

Atsüanem nungdaker: Tang ya joko asen Aori angatetsüogo, asenok tsüngda atsüanem kateptsü mapang, kechiaser maparen, tia jenjang aser tangari asen shinemtsüba (mezüngmeshiba) ajak yagi asenok kanga anua kümdaktsüogo. Anungji Ao senso tajungtem arung, oshioben aser asen sobaliba ajak atema joko iba ken ya dang tentepa kati ka temulungjang ajak agi agizüktepd;

"Oh ako-trong, na pika arung-ni ... ni-ka pi-ka arudi,
Ooooooh, tesem lenten nungji, asen-asen a-jurtepd...

(Iba onük ya Wb. I. Temjen Tzüdir-i "Kaket Zülur Shisamolu" ta sür sentong ka Ao Rijui achayanga Rongchii 26, 2025 nü Aor Kilem, Mokochung nung agidang, pa indang paper presentation temelaba agir adoktsür. Tezülar ya Kelingmen nung aser Ao Rijui (Ao Academy) nung Publication Head lir).

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

MAOT & ABAM Youth Ministry-i lanur 46 nem lenisüba tsütsü training agütsü



ABAM Youth Ministry aser MAOT na longjemer ayongba shisatokden sentong nung shilem agirtem aser tayongertem külemi tangokba noksa nung angur.

Mokokchung, September 24 (TYO): ABAM Youth Ministry den longjemer Mokokchung Ao Officers' Telungjem (MAOT) ajanga anogo ananü Youth Empowerment through Agriculture and Leadership Training sentong ka "Grow Skills, Grow Enterprise, Grow Leaders" omen dak rangloker katsüogo.

Iba training ya September 22 & 23 anogotem nung State Agricultural Research Station (SARS) Yimsemyong, Mokokchung nung agi aser sentong nung Ao Baptist Arogo Mungdang den sentaktepa alibaAarogotem aser rejutem nungi lanur 46 tashi arua shilem agia aden.

Sentong nung Agriculture, Horticulture, Krishi Vigyan Kendra, Veterinary, District Rural Development Agency aser Nagaland State Rural Livelihoods Mission nungi nungi takutet shisalen tuyur 17 arua

shisatsü balala lemsatapa liasü.

Iba training nung theory den practical dena ninang metsüba, atsü nung tsünüsembong balala yokba, oyster konger anepaluyim, tsünüsembong junga adoktsü atema mol anepaluyim, an metsübayim, süngdong tila anepaluyim, lanur telok aser aroki inyakba mapatong (enterprise), lenisüba aser aluyimba tsütsü business indang tesayuba balala agütsü.

Iba training ya lanur nem aluyimba tsütsü practical tesayuba, maongka tasen asoshi shisadanga asameyangba aser lenisüba shisa agütsütsü nükjidong nung ayongba lir ta tayongertemi metetdaksü. Iba den külemi aluyimba ya peisasa pei peri züsentettsü, maongka/ mapatong tasen lapoka aser nübur terenlok asoshi lenmang tajung ka ama ajungkettsü merangba ka lir, ta parnokisa shisem.

Sentong nung shilem agirtemi pei mapa nung takok

anguba otsü den parnoki timtem balala ajangshibatem lemsatap. Parnokisa aibelen nungi angazükba balala den maneni merangba aser lokti aser sobaliba tsütsü tayongzükba balala ajurubatem ajangeta aotsü asoshi shisa lemsatap.

MAOT tir aser Joint Director, SARS, I. Lipokonen Jamir-i training nükjidong ashidang, lanurtem asoshi aluyimba tsütsü maongka jenti aliba indang lemsatap. Pai, state nung mapa bushirtem tali akümba aser mapa inyaktsü maongka ajema akümba dak sentakba onük kar lemsatapedang, na mapa inyaktsü maongka atema dang masü saka mapa adokdaksütsü nükla yur inyaktsü ajungshi.

Iba sentong nung MAOT tongti zülur aser Assistant Prof. Yashikala Jamiri training indang oki latsü aser MAOT tatong tir, Er. Chubatoshi-i melepzüng o lemsatap.

ANOGO ABEN TSÜNGREM DEN

Takok Agütsüba Matt. 6:5-15

Khristan shia nükjidongji Yisu mesüka alitsübaji asütsüla. Yisu dak aliba jakla tajung ajakji taidok agütsübaji liasü. Yisui temulungjang ajunga agi chichiba taidok agütsüba ama nisung shinga melika.

Asenoki Yisu mesüka linüra Yisu ama tatok agütsüba tashiji ululoka alitsü bushitsüla. Pa alima nung taküm tembanga arudang mepelai bilemba aser tesempa nungi nüji süa liasü. Asenok meimchir tesendaktep nung timtemji asenoki sadoksadoka temulungjang ajak agi taidok magütsütetba aser mulunga maliba ajanga timtem adokdaksür. Khrista dak amanger ka ama tamajunger dang Pai inyakba ama asenokia taidok agütsütsü angazüktsü Tsüngremi yariang.

Khristai taidok agütsüba shidakbaji kechi ta süngmangtsüa kar. Yangi teyari kuli ka agütsür: Taidok agütsüba tashiji nai kar dang mejungi inyaktsü bilema alidang, shibai anema nai tamajung inyaktsü bilema liasü pa/ la nem taidok agütsütsü tashi Tsüngremi agütsür. Anungji ibai Tsüngremi agütsüba tashi ta angatettsü. Aiben tatok agütsütsübaji shibai agütsür aser shibai agizüker anaprongla atema tasak. Aji saka yirua aliba nüji akümtsü asoshi tatok agütsübaji dang lemanng lir.

Item ya shisadangan: Ni taidok agütsütsü aser amadoktsü tashiji lir ma? Ni bilemtetaka taidok agütsütsü tashi ulushia lir ma? Ni tatok magütsütetba nisung kar lir ma? Shiba ni anema mejungi inyak pa dang taidok agütsütsü kechiba ni ratamatar ?

Kü taküm dang shi ang, Ni ne tekümtet.

T.Ken 35:3

*Ni Kibuba na kümzükba,
aser na alangzükba ta nai metettsü.*

Isa. 60:16.

CBCI nungi lenirtemi Tamil Nadu sorkar nem tenüngsang agütsür



September 24, 2026 nü Chennai nung aliba sorkar middle school ka nung Tamil Nadu Chief Minister C. Joseph Vijay-i kaketshirtem den külemi chiyungba noksa nung angur. CM-i state tesem ajaklen Free Breakfast Scheme tasenba tenzüktsüogo.

Chennai, Rongjui/ September 24, 2026 (Agencies): Tamil Nadu state sorkari sorkar school tem nung class 5 tashi nung azünger kaketshirtem nem chiyungtsü agütsüba scheme ulushija class 8 tashi nung azünger nem chiyungtsü agütsütsü lemtetba atema Arogo nung lenirtemi state sorkar nem tenüngsang agütsüogo.

Arogo nung lenirtemi, iba scheme (free breakfast program) ya ajanga class

takdang nung tanurtem ayaba ajema akümtsü aser sensaker kibongtem nungi tanurtem aika school-i aotsü, ta ashi.

Free breakfast program ya küm pezü tejaklen tenzüka liasü, ajisüaka class 1 nungi class 5 tashi nung azünger tanurtem nem ang angati chiyungtsü agüja liasü.

India nung school tem nung angati chiyungtsü mezüng agütsüba state ji Tamil Nadu lir (1920s) aser tangbo sorkar school tem nung tanurtem nem

angati chiyungtsü agütsüba ya national policy ka kümogo.

September 22, 2026 nü Chennai nung aliba middle school ka nung Chief Minister, Joseph Vijay-i iba scheme ulushiba ya tenzükja liasü. Iba scheme ajanga state nung sorkar school aser sorkari yariba school 15,454 nung tanur million 1.53 tajangzük angutsü.

Catholic Bishops Conference of India (CBCI) Office for Education & Culture secretary, Maria Charles-i, "Iba scheme ya kanga junger. Yimtsüngtem nung school züngtur anenertem kanga ajema akümtsü atema tanga state temia iba scheme ya benoktsüla," ta ashi.

September 23 nü osangbener den jembidang Tamil Nadu Bishops' Council's Department for Education deputy secretary, Francis Joseph-i, "Shisaliok ajungba ajanga dang tarutsü jenjang ajungtsü ta sensaker kibongtemi

mangdang ayur. Chiyungtsü angati agütsüba scheme ya ajanga sensakertemi school-i meranga oteptsü aser shisaliok junga angutsü," ta ashi.

Tang Global Hunger Index nung linük 123 nungi India ya jenjang 102buba nung lir aser India score ji 25.8 dang lir. India nung nütsüng shilem 12 bo chiyungtsü agi matur.

All India Catholic Union otongdar, John Dayal-i, India nunger nüchiso mangudangyongi Tamil Nadu-i linük lenia liasü aser sensakertem nüngdak meteta yaria liasü, ta ashi.

Putirisa, "1920s mapang nung The Madras Corporation-i school azünger tanurtem nem chiyungtsü agüja liasü, aser iba state nungbo chief minister inyaka arur ajaki tanur chiyungdaksütsüji teinyaktsü mapa ka lir ta angateta inyaker. 1950s nungibo iba program ya state tesem ajaklen inyakba program ka kümogo," ta metetdaksü.

Tamil Nadu nung 1982 küm nungi arrshi küm 2 nungi 9 purtem tashi nem chiyungtsü tajung agütsüba program tenzüka liasü aser 1984 küm nungibo iba program kübok arrshi küm 10 nungi 15 purtem tashi züngoka liasü.

Free breakfast program ya 2022 küm September ita nung taoba mapang Chief Minister M. K. Stalin-i tenzüka liasü.

Jesuit putir aser Loyola College Society nung tatong Tir, Francis P. Xavier-i, "Iba program ya ajanga kanga sensak tia nung aliba kibongtem, talisa yimtsüngtem nung aliba kibongtem kanga teyari angur. Sensaker kibongtemi aiben pei chirnurtem school-i yoktsü melen mapai yoker mesüra kidang mongdaksür," ta ashi.

Paisa, iba program ya tanurtem meyadaksütsü, school nung anibelem mesüdaksütsü aser school züngtur anenba ajema kümdaksütsü atema lir, ta metetdaksü.

Tir Yimyim

* Ajungben aiener arudang horotatsü soa chidaktsür.

1. Alimang, 2. Pongen, 3. Samaru,
4. Nün, 6. Pio, 9. Nüngdak,
10. Yongya, 11. Kongro, 13. Ora,
14. Ata.

Chief Minister-i ashiba agi, iba senden nung Deputy Chief Minister Nemcha Kipgen, Home Minister Govindas Konthoujam, Art and Culture Minister Kh Loken Singh, Chief Secretary Rajeev Singh Thakur, administrative secretary tem aser tanga ketdangsür tejentemi shilem agia liasü.





**UFBU/ASSOCIATION-i
LONGKAK AITTSÜ SANGDONER LIAKA
BANK INYAKYIM MANENTSÜ**

SEAMLESS BANKING, HASSLE-FREE SERVICES

Longkak aitba mapanga customer tem atema banking ayonga
kümdaktsütsü atema onok bendanga agütsür lir.

ATM TAAH MAGITSÜ

28th–30th September 2026

Linük nung mashi bank ka indang
ATM ajanga senotsü tsütatetpa
atema taah magitsü

**DEOBARNÜ BANKS
LAPOKA ALITSÜ**

27th September 2026

Public Sector Banks & Regional
Rural Banks tem ajak September
27, 2026 nü taoba mapang ama
inyaksangshitsü.

24x7 UPI/IMPS RTGS/NEFT PAYMENTS

Mashi mapang ka nung mashi tesem ka nungi kecha
tetsükdaktsü makai senotsü tsütateptettsü,

BUSINESS CORRESPONDENT NETWORK

Nenok tesem nung aliba bank mashi ka indang BC
networks amshiang.

BANK DIGITALLY, ANYTIME



Mobile Banking



Internet Banking



WhatsApp Banking

*All Banks are Together and Committed
for Smooth Banking Services*



PELABA LEMSATEPER

Onoki teti meima aliba asür **RONGSENTEMJEN** (UNGER) mapang tatsüka shiranga alidang aser iba akümüli toktüsür aoba mapang onok mangyim tia nung alidang shirnokisa nübo, shisatsü, rongsen aser sarasadem agi onok yariogo nenok ajak dang kangasa pelaba lemsateper.

Nenok temeim mapa tajung asoshi tulusang Tsüngremi maneni moajangma.

28.04.1955 - 18.09.2026

Temeim Kinungtsü, Chirnurtem, Semchirtem, Anükapang aser Kinungertem

SÜR KÜM KA AJUNGBA MUNUNGRA BILEMTETER

Lt. MEYIMONGLA



Tasüba anogo: 25.09.2025

Oja na onok nungi pila-a tatem makadak limai or küm ka süitema arudang onok mulungjang nung teti menungrar aser iba anogo bilemteta sarasadema amonger. Na tanü onok den meliaka ne temeim teti onok mulung nung alitsü.

Nai teti meima aliba,

- Temeim chimur, semchir aser kinungertem.

Iran aser US yimjung ken o jembishinüba nung tepila lir

United Nations, Rongjui/Sept. 24 (Agencies): Iran tir-i UN General Assembly nung Tehran-i kodanga US matsüngdang mapudaktsü ta ashiba sülen, rara tembangtsü onük nung Iran aser United States tepila tuluka lir saka jembishinü manentsüla, ta Iran ketdangsür kati Bodhbarnü ashi.

Iran Tir Masoud Pezeshkian-i New York nung jembidang, US Tir Donald Trump dak mesüshitsü tangatetba aliba aitsü, shibai Mongulbarnü kasa sapang amshia Iran samatsütsü amokmerena liasü.

Küm nung khi adenshiba UN mungdang nung lenir ana tsüngta toktepa o jembiba ya US aser Iran tsüngta ita aika jembishinüa aruba tetenzük aser tatem bang amai sayur, ajisüaka yimjak nung iba rara tembangtsü asoshi teimla majiteter.

Iran ketdangsür kati pa tenüng memetdaksüi ashiba agi, Tehran ya Washington nungi par 'peace proposals' nung telangzüba agütsüba asadangba mapang lir, kong Iran nung rongnendak tesemtem US-i mokdanga aliba agentsü aser Strait of Hormuz tanaben lapoktsü indang shia lir.

"Iran aser US taginüba nung meputepba aika lir, saka jembishinü manener," ta ketdangsüri ashi.

Bodhbarnü osangbener den jembidang, Iran den tezüngzüktep ka yanglutsü asoshi meranga inyaktsüla aser mapang agitsüla, aser Trump ket nung 'military options' lir, ta US Secretary of State Marco Rubio-i ashi.

US-isa Bodhbarnü sülen Iran nung tayimtsü anendaktsüba linüktem nung 'secondary sanctions' agütsütsü ta ashir. Iran Supreme National Security Council indang secretary Mohsen Rezaei-i state TV dang, Iran kidanger linük temi Iran nung tayimtsü soita yura kidanger linüktem indang airports tema mapa meinyaktettsüsa Iran-i mera agitsü, ta ashi.

Züngsem 193 aliba General Assembly nung Pezeshkian-i US-i Iran nung rongnendak tesemtem mokdangba aser Strait of Hormuz nung rangloker jembiba, koba ajanga rara metenzük dang alima nung amshiba totzü aser liquefied natural gas shilem 20 shi belena liasü.

(Maneni tapak 8 nung...)

Tashi kasa bener Trump aser Xi Jinping na ajuruteper



Washington, Rongjui/Sept. 24 (Agencies): US Tir Donald Trump aser China Tir Xi Jinping na Brehostibarnü White House nung ajuruteper senden amendang jembitsü ken o tasak peria lir.

Trump indang administration-i China dang par jenjang amshia US-i aginüba ama inyaka ita tenet jungnüa raraba tatem kati arutsü asoshi Iran ajungshidaktsüner aser rongsenketzüng tsütsü tebilemtsü agütsür.

Külen Xi yagi Trump-i Taiwan dang nok-nü ayokba teti atema anenba reprangner aser US dang cutting-edge advanced chips ayokba nung tenokdangba agüja aliba saladaktsüner. Bodhbarnü linük ana yagi November 10 nü liwatsü aliba küm ka indang trade truce ano ita ana atsülangtsü mulungtepogo.

Technology ajanga mapa makai kumdaktsütsü mesüra nisung meimchir tema samatsütsü ta alima nung shisabolua aliba mapang, artificial intelligence onük ya tongtipang süa jembitsü, ta Trump-i Brehostibarnü social

media post ka nung ashi.

"Kong ali, ni yangji shidak nung yutsüner. Ibaji China indang jenjanga lir," ta Trump-i zülü.

Xi aser pa kinungtsü Peng Liyuan na Bodhbar nikongdang Washington tezülen Joint Base Andrews tonga arudang Trump aser pa kinungtsü oa agizüka liasü.

Treasury Secretary Scott Bessent-i lenir ana ya national security nung kongshitsüsa AI tatalokba tem atema "notification mechanism" tasen ka asoshi jembishinü akatsü akok, ta ashi. Saka AI aser tanga ken o tamajung aika nung terenlok alitsü asü masüar mejangja.

Washington tonga Xi arur mapang tatsüka lir Bessent-i Fox News nung tenati trade truce atsülangtsü tangatetep kati aruogo ta sangdong, koba taoba küm South Korea nung yanglua liasü.

Trump'er Republican Party ya November ita midterm election nung Congress amokbangtsü meranger aser rongsenketzüng nung timtem tali metuzüktsü. Kasa mapang Xi ya

China rongsenketzüng tensa khenyongi balaka nung lir.

Taoba küm shishilempaba tongpang aliba mapang US tariffs ya shilem 145 tonga liasü aser China-ia meyiper tariffs shilem 125 meshia liasü. Trump aser Xi na taoba küm South Korea nung ajuruteperba sülen US tariff rate ya shilem 47 shi akumul aser China-i shime 30 shi mesh.

US-China tesendaktep nung Taiwan ken o ya tamajungtiba lir ta repranger, ta China-i jangja-jangja metetdaksüogo.

Beijing-i Taiwan ya Chinese territory ama züngshir aser nüngdak dang süra tashiyim amshia iba asetkong agitsü ta nangzüka lir. Külen mainland-i amakba nokdangtsü asoshi US-i Taiwan nem hadir peria agütsütsü ozüng nung lir.

China-i Washington dang teti asoshi nok-nü ayokba anentsü ajungshia arur, aser talisa May ita Beijing nung Trump aser Xi ajuruteperba mapang jembia liasü.

Iba senden amenba sülen Trump-i Taiwan dang sen \$14 billion jenjang nok-nü ayoktsü renema aliba soita ayur ta sangdonga liasü.

Pakistan-i tayimtsü amshia amakba langzütsü: Afghanistan

Kabul, Rongjui/Sept. 24 (Agencies): Pakistan-i tayimtsü amshia Afghanistan nung amakba mapang nisung pezü süogo, ta Afghan Taliban sorkar indang odongtar kati ashi aser tapet telangzüba agütsütsü nangzü.

Pakistan-i Afghanistan nung drones yua aliba aser arütsü alema arua amakba nung amshiba drones yua aliba tesem ter nung tayimtsü amshia amak ta Brehostibarnü ashi.

Afghanistan nung Taliban sorkar indang odongtar Zabihullah Mujahid-i ashiba agi, tayimtsü amshia Kandahar, Paktia aser Khost provinces tem amak.

Jet ka ola angashi aser iba sülen ola tulu adoka apok aser Kandahar yimti tiyong nung mi adok, tab a yimti nung alir kati osangbener dang ashi.

Pakistani Information Minister Attaullah Tarar-i Pakistan dak amaktsü

merangba nung sendaka aliba 'military objectives' nung asaa, mezüng-mezünga aser kanga kumdanga amak ta ashi.

Bodhbarnü asaa aser ozüng agi memelai Pakistan telungi drones aitba pai aija liasü.

"Ibai Pakistan indang sovereignty aser territorial integrity nung asaa aibelenba lir aser agizüktsü makokba tashiyim mapa tamajung lir," ta pai ashi.

Taliban ketdangsür temibo par sorkari Bodhbarnü Pakistan dak drones amshia mamak ta ashir.

Taoba mapang tembar tajung aliba telungpur telok temi Pakistan nung amakba ajanga tensa mejungi kumer lia Brehostibarnü tayimtsü amshia amakba ya ataloker.

Kabul nung arütsü alema arua amakba telungpur tem jenokdaksür, ta Islamabad-i aitsür, saka Afghanistan nung Taliban sorkari Pakistan anemba telungpur telok tem

mejenokdaksür ta ashir aser ibai Pakistan linük telungzük tebilemtsü lir ta ashir.

Taoba hopta northwestern Pakistan nung police facility ka amakba mapang nisung 21 tepseta linük ana tsüngta ita asem jungnüa süngjema aliba anokshitsü. Iba tesem nung bomb pokdaksüba aser iba sülen khatepba asoshi Pakistan Taliban faction kati tenüng agiogo.

Hombarnü Afghanistan northeast tsütsü Kunar province kübok Nurgal district nung tesem asem nung tenük yoker tayimtsü amshia amakba mapang civilian asem tepset, ta Afghan ketdangsür temi ashir. Islamabad-i yangji kiralongrar nisung 28 tepset ta ashir.

Kidanger ana tsüngta yimjung alitsü asoshi China, Turkiye, Qatar aser Saudi Arabia tetsüngtai ia jembishinüba nung tensa mejungi akumba yagi anokshitsür.

Asian Games: Roshibina-i silver aser mixed skeet team-i bronze angu



Rongjui/September 24, 2026 (Agencies): India tsürtem rongnungi wushu asayar Roshibina Devi-i tang asaya aliba Asian Games nung Brehostibarnü silver medal ka nguogo.

Roshibina, shibai selection trials nung Divyanshi Choudhary menoki liasü, la ya Divyanshi yiruba sülen India team nung anioka liasü. Tetsür 60kg sanda final asaya nung lai China tsür Zhang Xiaoyu 0-2 agi makok.

Arishi küm 25 tain asayar yagi Asian Games nung tang agi tasembuba medal nguogo. Lai 2018 küm Jakarta-Palembang nung bronze aser 2023 Hangzhou Games nung silver medal ngua liasü.

Roshibina-i, Vietnam tsür 2023 world champion Nguyen Thi Thu Thuy knocked out sütsüba sülen final tongteta liasü.

Tanga India nunger asayartem rongnungi Aryan (tebur 56kg) quarterfinals nung tsük aser Aparna (tetsür 52kg) round of 16 nung tsüka liasü. Vikrant Baliyan (tebur 75kg) bo mezüngbuba round nung tsükatok.

Brehostibarnüsa mixed team skeet event nung India nunger Anant Jeet Singh Naruka aser Parinaaz Dhaliwal nati bronze medal nguogo.

India nunger tarep yagi final nung point 44 ngua tasembuba jenjang nung tembanga liasü.

Tena mezüngbuba series nung tenetbuba nung tenzükbaba sülen tanungba series tem nung tanem tanemi tejakdangi tua liasü

Qualification nung tena senteper point 138 anguba sülen pezübuba nung tembanga final atema qualify süa liasü.

Iba asaya nung bronze medal ka anguba sülen India

nunger shooter tem tang tashi nung silver pezü aser bronze medal pezü ta ajak senteper medal ti ngua lir.

Bodhbarnü India tebur aser tetsür skeet shooting team temi bronze medal ana ngur liasü.

Kasa asayamung tebur badminton team asaya semifinal nung China 1-3 agi makokba sülen India tebur team-i bronze nguogo

Lakshya Sen aser Ayush Shetty nati kija asaya nung tena dang nungi temaba jenjang nung aliba asayartem menokteti liasü.

Tarep asaya nung Satwiksairaj Rankireddy aser Chirag Shetty nati Paris Olympic silver medallists aser reigning world champions Liang Wei Keng aser Wang Chang na koka liasü, saka tanungba asayartemi asaya ka dang mekokteti parnok tamakok nguogo.

India aser West Indies na asayamung mapanglem sangdongogo

Rongjui/September 24, 2026 (Agencies): India tebur cricket team September 27 nü nungi tenzüka October 17 nü tashi West Indies den ODI asem aser T20I pongu asayatsü.

India T20I team ya Shreyas Iyer lenisüba nung asayatsü aser Shubman Gill-i ODI team anitsü. West Indies team bo T20I aser ODI naprongla Shai Hope lenisüba nung asayatsü.

T20I asayatem Lucknow, Ranchi, Indore, Hyderabad, aser Bengaluru nung October 6, 9, 11, 14, aser 17 nü asayatsü, aser ODI asayatem Thiruvananthapuram, Guwahati, aser New Chandigarh nung September 27, 30, aser October 3 nü asayatsü.

IND vs WI Schedule ODI mapanglem

1st ODI : September 27
2nd ODI : September 30
3rd ODI : October 3

T20Is

1st T20I : October 6
2nd T20I : October 9
3rd T20I : October 11
4th T20I : October 14
5th T20I : October 17

Squads

India (ODI): Shubman Gill (C), Rohit Sharma, Virat Kohli, Ruturaj Gaikwad, KL Rahul

(VC & WK), Dhruv Jurel (WK), Nitish Kumar Reddy, Ravindra Jadeja, Kuldeep Yadav, Prasidh Krishna, Gurnoor Brar, Mohammed Siraj, Auqib Nabi, Yashasvi Jaiswal, Naman Dhir.

India (T20I): Shreyas Iyer (C), Abhishek Sharma, Vaibhav Sooryavanshi, Ishan Kishan [WK], Sanju Samson (WK), Tilak Varma (VC), Shivam Dube, Kuldeep Yadav, Axar Patel, Washington Sundar, Ravi Bishnoi, Nitish Kumar Reddy, Arshdeep Singh, Prince Yadav, Mayank Yadav.

West Indies (ODI): Shai Hope (C), Jewel Andrew, John Campbell, Keacy Carty, Roston Chase, Matthew Forde, Justin Greaves, Amir Jangoo, Alzarri Joseph, Shamar Joseph, Vitel Lawes, Gudakesh Motie, Keemo Paul, Sherfane Rutherford, Jayden Seales.

West Indies (T20I): Shai Hope (C), Jewel Andrew, Roston Chase, Matthew Forde, Shimron Hetmyer, Akeal Hosein, Shamar Joseph, Gudakesh Motie, Keemo Paul, Kamil Pooran, Rovman Powell, Sherfane Rutherford, Quentin Sampson, Romario Shepherd, Shamar Springer.

Valverde yiruba ajanga India den masayatetsü



captain Federico Valverde bo iba hopta tetenzüklen yiruba ajanga masayatetsüsa kümogo.

"Real Madrid Medical Services-i tanü temang tendangba sülen Fede Valverde tetsür tabelen teloktep yirur aliba ngutetogo," ta Real Madrid-i sangdong ka ajanga metetdaksü.

"Brazil maru tsüngda Uruguay team Kolkata nung anogo pongu training camp ka asoshi India-i arutsü. Parnok training sessions pongu agitsü aser session kabo fan tem atema lapoktsütsü akok," ta ketdangsür tejen kati TOI dang ashi.

TOI sangdong ka ajanga ashiba agi, Uruguay team ya Seoul nungi private charter flight ka nung Kolkata-i arutsü. Uruguay asoshi iba yimti ya tasen masü, kechiyong parnoki 1982 küm Eden Gardens nung Nehru Cup kokogo.

FIFA World Cup Golden Boot ngur alisang coach Diego Forlan-i aniba team ya Japan aser South Korea den friendly asayaba sülen India-i arua Asia nung tatembangbuba asaya asayatsü.

Rongjui/September 24, 2026 (Agencies): Real Madrid nungi nüngtugu midfielder Federico Valverde, yiruba ajanga India den taruba ita friendly ka asayatsü aliba Uruguay team den marutsü, ajisüaka team bo October 6 nü masaya tsüngda Kolkata nung anogo pongu camp ka akatsü.

World Cup anaben koker aliba Uruguay team ya September 30 nü Kolkata tonga arutsü. Parnok India tonga aruba sülen anogo ka lir FIFA World Cup pongu koker aliba Brazil team October 3 nü Salt Lake Stadium nung India den asayatsü atema arutsü.

World No. 20 Uruguay team aser India na kasa ground nung asayatsü. Ajisüaka Uruguay

BENDANGLI OSANG :

Tapak 7 nungi...

Iran aser US yimjung ken o jembishinüba nung...

"Iba tzü lenmang ajanga ozü rong tem mesenzüdaksüü iba Strait of Hormuz nungi nisung ajak majangzükdaksütsü. Tsükchir rongtem teti asoshi yokba aser rara ulushiba ajanga yimjung bener marutsü," ta pai ashi.

"Iran nüburi iba tebilemtsü nung mapudaksü," ta Iran tiri ashi. Iran-i strait ya amokbanga iba tongtipang tzü lenmang amshiba rong tem dang fees meshiner. Washington-i aji magizüker aser strait ya international shipping asoshi jungjunga lapoka alitsüla, ta ashir.

Tehran ya nuclear nok-nü yanglutsü aliba pai nokdang aser rara tembangtsü asoshi tezüngzüktep ka meyanglura Islamic Republic ya samatsütsü, ta Trump-i Mongulbarnü shia liasü.

Bodhbarnü Pezeshkian-i nenshia Iran ya nuclear nok-nü yanglutsü meranger masü ta ashi.

July ita ceasefire raksaba sülen Iran aser US

ketdangsürtem tsüngta odongtar yur mezüngbuba jembishinü Mongulbarnü liasü aser iba mapang Iran indang Foreign Minister Abbas Araqchi aser US envoys Steve Witkoff aser Jared Kushner nung odongtar ajanga jembishinüa liasü.

Qatari mediator ajanga ghonda ana Washington den tebilemba lemsatepdang Tehran tangatetba metetdaksüogo, ta Iranian Foreign Ministry spokesperson Esmail Baghaei-i ashi. Yangji tesem ajaklen rara tembangtsü, US-i tashiyim amshiba anentsü aser soita aliba Iran nunger rongsen ajunga chioktsü dena liasü.

New York nung jembishinü akaba asoshi hardliners den sendaktepa alirtemi Iranian media nung aitsü.

Revolutionary Guards den sendaktepa aliba semi-official Tasnim news agency nung, Araqchi-i Witkoff aser Kushner den jembishinü akaba ya tai aser ibai Trump nem sempet tulu agütsüba lir, kechiaser Iran-i taginüba metetdaksüogo, ta

shia liasü.

UN General Assembly nung Iranian delegation dang America nunger den majuruteptsü Supreme National Security Council ajanga totuyuba agütsür liasü, ta Iranian osangtem ajanga ashir. Supreme National Security Council nung züngsemtem ya Iran Supreme Leader Ayatollah Mojtaba Khamenei-i shimba nübutem dena lir. Khamenei ya tebu melenba sülen yimjak nung tang tashi mangur, shiba rara mezüng anogo tepseta liasü.

New York-i aruba kisüng ya asür Ali Khamenei mezüngmeshir ama hardliners karibo repranger, ta Iran nunger osangbener kati ashi.

Trump-i February ita Israel den külemi "Operation Epic Fury" nüngja agütsür tenzükbaba rara ya ita tenet tajunger, kong nisung meyirijang aika tepsetogo, alima nung energy supplies nung timtem agütsür aser region nung tanga linük tem nunga prokshia aor.

BILEMDANGANG

"Anütetsü repranga makazüi tejakleni oang."